

Uunga siunnersuut: Sumiiffinni immikkut toqqakkani takornariartunut kiffartuussinermik ingerlatsinissamat akuersissuteqartarneq pillugu Inatsisartut inatsisissaattut siunnersuut

Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq

Akissuteqaat

(Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Aappassaaneerinnineq

Inuussutissarsiornermut Aatsitassanullu Ataatsimiititaliaq Naalakkersuisut isumaliutissiissummut qutsavigaat.

Sumiiffiit akuersissuteqarfiusussat nalunaarummi¹ aalajangersarneqarnerat kismaassinissap atortinneqarnissaanut periarfissamat tunngassuteqarpoq. Tamanut nalunaarutiginninneq pisimangippat, kismaassinnaanarup unioqqutinneqarnera pineqaatissiissutaasinnaassanngilaq. Tamanna akuersissuteqarnikkut taamaallaat malittarisassiunneqarpat, tamanna akuusunut isumaqatigiissummik isumaqatigiissuteqarsimasunut taamaallaat kinguneqassaaq. Sumiiffiit toqqarneqartarnerisa, pilersarusiortarneq pillugu inatsimmut naapertuuttumik pinissaat aamma kommunit nammineq aalajangiisinaanermut pininnaatitaanerannut naapertuuttumik soorunami pinissaa, periarfissaliissutip aalajangersarneqarnerata allanngortinngilaa. Taamaammatt siunnersuut kommuninit piginnaasaqarnerannik Namminersorlutik Oqartussanut nuutsinermik kinguneqanngilaq.

Pisinnaatitaaffinnik piginnittup sumiiffimmi sulisitanik atorfinitsitsinissamik imaluunniit pisiortorfinnik atuinissamat pisussaaffii pillugit malittarisassanik aalajangersaanissamat periarfissaq, takornariartitsinermik inuussutissarsiummi siuariartortoqarnissaanut qulakkeerinninnissamat aamma sumiiffinni suliffeqarnermut pitsaasumik sunniuteqarnissaanut, siunissami sakkussatut eqqarsaataavoq. Sulisunik avataaneersunik atorfinitsitsineq iluaqutaasinnaasoq aamma pisariaqarsinnaasoq Naalakkersuisut akuersaarpaat, ingammik piffissami suliassaqarfinni amerlasuuni sulisussanik

¹ § 3-mut innersuussisoqarpoq:

”§ 3. Nunami sumiiffinni killilinni takornarianik sullissinermik tunniussinerni, akuersissummik tunniussisoqarnissaata piumasarineqarnissaa pillugu Naalakkersuisut malittarisassanik aalajangersaasinnaapput. *Imm.* 2. Sumiiffimmi tassani takornarianik sullissinerit allatut ilusillit tunniunneqarsinnaanerit, sumiiffimmi takornarianik sullissinerit suussusaannut aalajangersimasunut akuersissummik piumasaqaatip mattutinngilaa.”

amigaateqartillugu. Pisussaaffiusinnaasup taassuma qanoq ilusilersorneqarnissaa, inuussutissarsiortunik oqaloqatiginnikkut pisussaassaaq.

Inatsisip malitsigisaanik inatsiseqartitsinermi pissutsit allanngortinneqarnerat pillugu ataatsimiititaliap paasissutissiinissamik inassutaa Naalakkersuisut tiguaat.

Oqaatsitigut unammilligassat Naalakkersuisut ajuusaarutigaa aamma siunnersuummik pingajussaaneerinnineq sioqqullugu tamanna iluarsineqassaaq.

Taamatut oqaaseqarlutik siunnersuutip akuersissutigineqarnissaa Naalakkersuisut inassutigaa.